

Dithero tsa Tirelano mo Kutlwanong

Thero ka letsatsi la go gopola papolo le loso lwa Morena, e le ka 6. 4. 2012

20/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 98 – 91/110

2. **Thapelo:** Kriste, Kwana ya Modimo, yo o ntshang lefatshe dibeng, re tlhomogele pelo. Kriste, Kwana ya Modimo, yo o ntshang lefatshe dibeng, re tlhomogele pelo. Kriste, Kwana ya Modimo, yo o ntshang lefatshe dibeng, yo o kileng wa bapolelwa sefapaanong, wa re swela, o re fe kagiso. Amen.

3. Epistolo ka fa thulaganyong ya 2 e kwadilwe mo go 2 Bakorinthe 5:14b-21;
Efangele ka fa thulaganyong ya 1 e kwadilwe mo go Johane 19:16-30.

4. A go ipolelwe tumelo ya bokeresete!

5. Sefela sa 99 – 92/100

6. Thapelo ya mmadi wa thero.

7. **Epistolo** ka fa thulaganyong ya 4 e kwadilwe mo go

Baheberere 9:15.26b-28, e re: "Ke ka ntlha ya moo Keresete e leng Moruanyi wa kgolagano e ntšhwa gore bone ba ba biditsweng ba amogele boswa jo bo sa feleng, jo bo boleletsweng pele. Loso lwa gagwe lo sena go diragala go nna kgololo ya ditlolo tsa sebaka sa kgolagano ya ntlha. ... Mme jaanong o bonetse gangwe fela mo bokhutlong jwa metlha gore a tlose bolelo ka go itira setlhabelo. Mme go tla dirafala jaaka batho ba beetswe go swa gangwe fela, mme go tla katlholo morago ga moo; Keresete le ene yo o dirilweng setlhabelo gangwe fela gore a tlose maleo a ba bantsi, o tla bonala la bobedi, e se ka ntlha ya bolelo, mo go bone ba ba mo lebeletseng go ba isa phologong." Amen.

8. **Thero:** Phuthego ya Morena, kajeno ke letsatsi la go gopola papolo le loso lwa Morena wa rona Jesu Keresete, Mopholosi wa rona. Mo dibekeng tse di fetileng re felegetse Jesu mo tseleng ya gagwe ya dipogo. Re mmonyane mo tshimong ya Getsemane, a rapela, a fufula marothodi a madi, kwa la laoletsweng loso teng. Ya re a sena go rapela, a bolelela barutwa ba gagwe, a re: "Tsogang re tsamaeng! Bonang yo o ntshwarisang o atametse," Math. 26:46. Ka matlho a tlhaloganyo le a pelo, re a mmona a sikare sefapaano, a fapholwa mo sefatlhegong, a kgwelwa mathe, a sotliwa, a rawesiwa serwalo sa mmitlwa, a latlhwa ke botlhe, ba kua, ba re: "A bapolelwe mo sefapaanong! A madi a gagwe a wele rona le bana ba rona!" Math. 27:23.25. Ke ene yo o tsamaileng, a ya mo thabeng ya Golegota, a sikare sefapaano, a bapolelwa mo go sona mmogo le dinokwane tse pedi, Jesu fa gare ga tsona, a swela teng mo sefapaanong, a tshwana le motho yo o nang le molato o mogolo, mme o ne a se na molato ope. Molato wa me, le wa gago, le wa lefatshe lotlhe o ne o le mo go ene, a le yo o hutsitsweng ka ntlha ya maleo a rona.

Rona, phuthego, re utlwelwa botlhoko ka lorato le ka bopelotlhomogi jwa Modimo gore re se latlhwe. Jesu a re ruanya, a re letlanya le Modimo ka go tima bogale jwa ona, a nna Motsereganyi yo o ruanyang, a letlanya batho ba ba lwang le Modimo gore batho ba agisanye ka kagiso, ba ruane, jaaka Paulo a kwala a re: "Mme tsotlhe tse, di tswa mo Modimong o o ithuantseng le rona ka Jesu Keresete, wa ba wa re neela tirelo ya thuananyo; gonne Modimo o ithuantse le lefatshe ka Keresete ka go sa ba balele maleo a bone, wa tlhoma lefoko la thuananyo mo go rona," 2 Bakor. 5:18-19. A re se ka ra leba thata tsa bogologolo, gonne di fetile jaanong, e ne e le moriti wa tse dintšhwa tse di tlhagileng jaanong ka loso lwa ga Jesu. Madi a gagwe a lekana gore a re itshekise mo maleong otlhe. Kajeno ke letsatsi la go ikwatlhaya, le go kopa bopelotlhomogi jwa Modimo ka ntlha ya maleo a rona. Jesu ke Motsereganyi wa kgolagano e ntšhwa. Tse di dirilweng ke ene di a lekana. Go setse go tlhagile se sešwa ka loso le ka tshologo

ya madi a ga Jesu mo sefapaanong. Ke ona a a lekanang ka botlalo gore re tlhaphisiwe ka ona mo maleong otlhe, re itshekisiwe ka ona mo tshiamololong yotlhe ya rona.

Ka re: Ke letsatsi la boikwatlhao, la go hutsafalela maleo, gonne fa re re: Ga re na boleo re a itsietsa, re dira Modimo moaki, mme Lefoko la ona le tla bo le se yo mo go rona, 1 Joh. 1:10. Yo o se nang boleo mo go ene ke mang? A re gopoleng baruti ba molao, mmogo le Bafarisai le mosadi yo o neng a tshwarwa mo boakeng. Ba mo isa mo go Jesu, re gopole le se ba se buileng ka ga mosadi wa seaka go se bolelela Jesu. Mme Jesu ya re a sena go utlwa tse ba di buileng ka ga mosadi yole, a re: “Yo o se nang sebe mo go lona, a e nne ene wa ntlha yo o mo konopang ka lentswe.” “Ya re ba utlwa, mme ba latofadiwa ke digakolodi tsa bone, ba tswa ka monokela go simolola ka bagolo go ya go wa bofelo, Jesu a tlogelwa a le esi, le mosadi a ntse a eme fa gare.” Wena, o a reng? A ga o na boleo, gongwe o na najo? Segakolodi sa gago, gongwe sa me se a reng? A re arabeng potso eo ka boammaaruri. Fa re se na maleo, re batlang fano kajeno? Ke ka ntlha ya gore maleo a re tshwere, re galefisitse Modimo. Re tla kopa bopelotlhomogi le boitshwarelo jwa maleo gore Modimo Rara a se ka a re balela maleo le molato wa rona. Bogolo kajeno ka letsatsi le legolo la thuanano re rata go ruangwa le ona, re a eletsa gore rona ba re biditsweng re bone boswa jwa botshelo jo bo sa khutleng. Ke jona jo o bo re solofetsang.

Phuthego ya ga Keresete, Jesu o rata go tlosa bosula jotlhe mo go rona, o rata go re golola ka madi a gagwe, a ineela mo losong lwa sefapaano ka ntlha ya rona gore a nne setlhabelo sa maleo a rona. A ikokobetsa gore rona re pholosiwe, ba re neng re le batho ba tatlhego le boleo ka fa tlhagong ya rona. Ee, Jesu o utlwile Rraagwe go ya losong, mo losong lwa sefapaano. A ikokobetsa. Ka loso lwa ga Jesu, loso lo fentswe. Jesu o re golotse mo losong lo lo sa khutleng, lo e leng go latlhelwa ruri mo moleteng wa molelo. Ga go tlhole go batlega gore re boife loso jaaka batho ba ba se nang tsholofelo ya botshelo jo bo sa khutleng. Jesu o fentse loso le Satane, le rona re solofeditse go fena loso le Satane ka go dumela mo go ene.

Jesu o ne a swela batho botlhe, mme loso lwa gagwe lo thusa bone fela ba ba dumelang gore ke ene Mopholosi wa bone. Yo o sa dumeleng mo go ene ga a amogele moputso wa tiro ya gagwe. Boleo ke bolwetse jo bo tshwanetseng go alafiwa, mme ga bo alafiwe ka ditlhare le melemo ya dingaka tsa mereo, le e seng ka ditlhare tsa dingaka tsa ditshipi, mme bo alafiwa ka madi a ga Jesu, gongwe mo mading a ga Jesu fela. Ee, batho ba beetswe go swa. Rotlhe re itse boammaaruri joo, mme o ka re: Bangwe ga ba bo itse. Ga re na go phologa gona, mme go tshegofaditswe ba ba swelang mo Moreneng. Re leboga Modimo o o re nayang phenyo ka phenyo ya Morena wa rona Jesu Keresete. Loso lo meditswe ke phenyo. Loso ga lo tlhole lo na le thata mo go rona. Morago ga loso go na le katlholo. Kgang ga e fele ka loso fela. Go latela katlholo. Katlholo eo ke se se boitshegang, gonne ga re ka ke ra ipuelela teng. Se se molemo ke fa re na le Motsereganyi le Moemedi wa rona, e bong Jesu. Jesu o tla bonala gape kwa ntle ga boleo mo go bone ba ba disitseng, gongwe mo go bone ba ba mo lebelelang, ene ke Mopholosi wa mewa ya bone. Jesu o dirile tiro ya gagwe, a re swela, le go re golola ka madi a gagwe. Ga diragala gangwe fela, a kua, a re: Go weditswe! Go diragaditswe ka botlalo tsotlhe tse di lebaganyeng le pholoso ya rona. Le senokwane sele se solofeditse gore se tla nna le ene mo Parateiseng ya gagwe, le rona re tla amogelwa teng ka go dumela mo go Jesu Keresete. Amen.

9. Thapelo: Kwana ya Modimo, wena yo o tlhabelweng o na le tshwanelo ya go tshola thata le khumo le botlhale le nonofo le tlotlo le kgalalelo le poko! Amen. Thapelo ya Morena: Rara wa rona yo o mo legodimong ...

10. Sefela sa 100 - 93/94

A kagiso ya Modimo e e fetang tshaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. Mkhabelo, ka ngwaga wa 2005

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.